

Eachdraidh an Iasgaich an Leodhas

Le SEUMAS MACTHOMAS

'S ann air eachdraidh iasgach an sgadain a tha Seumas MacThómais a' toirt cunntais an so. Tha sinn an dòchas gu lean e air an sgeul is gun toir e dhuinn uair eile eachdraidh air seòrsachan iasgaich eile. Anns an earrann eile de'n chunntas so gheibh sinn cuid-eachd sealladh air caitheamh-beatha nan iasgairean agus clann-nighean an sgadain.

An t-seann "Mhùirneag"
—am bàta iasgaich a b'ainmeile a bha'n Leódhas riamh.



CHAN eil cunntas againn gu robh obair iasgaich a' dol air adhart mu chladaichean Leódhais roimh thoiseach an t-siathamh linne deug, ach tha fios againn gu robh na Deasaich ag iasgach anns na lochan mu thimchioll an Eilein fad iomadh bliadhna mus tàinig deireadh an linne sin. Tha e air aithris nach robh na Leódhasaich idir buidheach leis an obair-sa, agus gun do chuir iad campar gu minic air na coigrich.

Thugadh oidhirp uair agus uair, le ughdarras an rìgh, air obair iasgaich a chur air chois anns na h-Eileanan a Siar ann am fìor thoiseach an t-seachdamh linne deug, agus rinneadh dà phort iasgaich, fear aca an Loch nam Madadh an Uidhist a Tuath, agus fear eile air Caolas na Hearnadh. Bha an t-uachdaran a bha air Leódhas aig an àm 'na dhuine geur-sheallach, agus chuir e roimhe gum biodh a chuid aige-san de shajdhbhreas na mara. Thug e cuireadh do dh'iasgairean as an Olaind an dachaidhean a dhèanamh an Steòrnabhagh agus thug e cothrom iasgaich dhaibh mar bu mhath leotha.